

56

GWERZ KOZ

SANT KONERI

gand eur skeuden euz ar re gaera

GWERZ KOZ

SANT KONERI

DISKAN

Sant Koneri, Sant evuruz,
Ouz mouez Doue bepred sentuz,
Pedet ma virfomp e lezen
Ha ma refomp gwir binijen.

Roue ar zent, Salver ar bed,
Roet d'in-me graz ha spered
Da disklerian da bep-hini
Bue 'n Otro Sant Koneri.

Laret a ra da heb-unan :
Mado an douar nan int man,
Avel ha moged, netra ken,
Pa ne badont ket da viken.

Avel ha moged, treo ar bed,
Graz Doue a-vad nan e ket :
Gant graz Doue er c'halono,
E tizer alc'houe an Nenvo.

4

Lezen Doue eo red miret
 Pe ve ezet, pe ne ve ket,
 Hag en ha n' Doue pardoni
 D'ar re a deu d'hon enebi.

En Breiz-Veur ar Zant binniget
 A oe ganed ha beleget :
 Izelek (1) hag hen disket braz,
 Furoc'h 'vit-an ne valeaz.

Furaat bemde a venne
 Ha kas d'ar penn lezen Doue :
 E vado d'ar paour a roaz,
 Skanvoc'h en hent mad e redaz.

Gant Tual, en e vanati,
 E oa manac'h Sant Koneri,
 En amzer ma teuaz eun ael
 Da weled an abad santel.

— « Sav prim, Tual, a laraz-han,
 Eman ar mor braz da dreuzan ;
 Da Vreiz-Izel eo red monet,
 Pa zo gant Doue lavaret.

Kenkent Sant Tual a zentaz
 Ha gant Koneri a deuaz,
 Gant Koneri ha kalz ouspen,
 Ouzpen tri-ugent 'n eur vanden.

(1) Da laret eo « Izel a spered ».

Kâd a rejont a-berz Doue
Eul lestrik hag a c'hortoe ;
War douar Arvor o dougaz
Ha kenkent en ear e teuzaz (1).

Piou oufe rei da intenti
Pe zantelez oa e hini ?...
An Otro Doue a gare,
Ha karet a re e hente (2).

Gant e beden e oa dalc'h-mad,
Dalc'h-mad beteg o labourat,
Fur ha glan a galon bepred,
Rag gant Doue oa e spered.

E gorf santel a gastie,
War an douar noaz e kouske,
N'evoa 'met bara ha dour yen,
Kemend ha bevan, netra ken.

E skouer vad hag e bedenno
'Oa e gaeran prezenno ;
Hep dale oa burzud gwelet
Ar vro da Zoue goneet.

(1) Da laret eo « e fontaz ».

(2) Da laret eo « e nesan ».

6

Eun dijentil a oa er vro,
 Eun den, Alvanduz e hano ;
 O tont eun de euz ar chase,
 E saludaz an den Doue.

Ar Zant a lare e beden,
 Neuze na dôle ple ouz den,
 Eun dra vad hag a lakeaz
 An Otro en eur gonnar vraz.

— Piou, emean, an azen-ze
 Ken rog ha pa vije roue ?
 N'em zalud ket p'hen zaludan !...
 Me a deuy a-benn anean.

E zenechal a oa gant-an
 Ha kenkent e laraz d'ean :
 — « An den-ze zo beleg santel
 Aman deued a-ziabel.

Aboue ma 'z ê arri er vro
 En deuz gret kalz a vurzudo ;
 Evid an holl e ped Doue,
 Na baouez tamm na noz na de. »

Ar c'homjo mad-man ne oant ked
 Evid dousaat e spered :
 Lavaret a rez da daou den
 Kerc'hat ar Zant en e lojen.

An daou-man oa goue 'vel loened ;
Distrei a rejont en eur red,
Ha da zailhat war ar Zant kez,
Evel bleidi war eun heiez.


Skei a rejont an den Doue,
Skei a rejont ken didrue
Ma torjont daou euz e gosto :
Ar Zant a oa hanter-varo.

Ar zenechal a arriaz ;
Re diweat e oa, ziuoz !
— « Paouezet, 'mean, ho tolio !
Paouezet 'ta, pe me 'welo. »

An den-man, evel eun den mad,
An daelo war e zaoulagad,
A dosta d'ar zant gant true,
Rag gwall-boaniuz 'oa e doare.

Ar zant, war e zaoulin zavet,
'Lere leun a evurusted :
— « Ma foanio, Jezuz, ma Doue,
Ma foanio nan int man d'ho re. »

« Er C'Halvar ouz ho kroaz staget,
D'ar pec'her hoc'h euz pardonet,
Pardon, ive d'am bourevien !
Pardon, pardon ha sklerijen ! »



An den lor' huz, Alvanduz ha sant Koneri.

Kenkent, pebez tra vurzuduz !
Stad an daou den a oe spontuz :
O fenn war o chouk kildroet
Ha hi o-daou mezevennet.

Evel barr delio e krenent ;
Na welent tamm, na tic'houezent ;
Ne oant ket 'vit finval kammet...
Gwalen Doue na c'hoari ket !

Ar zenechal, braz e estlamm,
A iez war varc'h, d'ar pewar-lamm,
Da digemen da Alvanduz
Eun dra a oa ken burzuduz.

An Otro, 'dalek ma klevaz,
Da lojen ar zant a redaz,
Hag hen d'an daoulin da bedi
Ma teurveje o fardoni...

Sant Koneri ouz o gwelet,
War o daoulin ken glac'haret,
A gavaz tu da brezek d'e
Ar gwir fe ha doujanz Doue.

Goude bean o c'helennet,
E tigasaz d'e ar yec'hed,
Yec'hed ar c'horf d'e a roaz
Ha hini 'n ine gwelloc'h c'hoaz.

An Otro 'bedaz Koneri
Da dont gant-an da chom 'n e di
— Deut gan-in, emean, Otro,
Ha d'ac'h me 'rei ma holl vado. —

Ar zant a lavaraz d'ean :
— Et d'ho ti ; me a chom aman ;
Losket em euz ma holl vado,
'Vit bevan paour e-maez ma bro.

E berr amzer e oe brudet
Ar burzud neve c'hoarveet :
Tro-dro ne oa gant pep-hini
Nemet kelo a Goneri.

A bep tu 'teuer d'hen kavet :
An dud klanv a glask ar yec'het
Ar re-all nerz ha sklerijen
Da vevan 'vel gwir gristenien.

Eur wech ar Zant a oa pedet
Da laret eun ofern euret
Rag ar priejo 'devoa fe
Da bedenno an den Doue

Dont a rez eta Koneri ;
Ar min a oa d'oferenni,
Ar min-oter n'en evoa ken
Nemet eur pilier d'hen zouten.

Pa oad en-kreiz an oferen,
Parfed an holl gant o feden,
An droug-spered, enn-an drouk braz,
Ar min dre 'n hanter a dorraz.

Evit-an da vean torret,
Ar min-oter ne finvaz ket :
Sant Koneri a oa eno
Trec'h e bedenn d'an diaoulo.

Ar Zant avad a c'hoantae
Bean e-unan gant Doue ;
C'hoant en oa da guz ouz pep den
E vue hag e binijen.

Rak-ze gant Doue kuzuilhet
E tilezaz koajo Gwened,
Da Plouvouskan en bro-Dreger,
E teuaz da zevel e ger.

Eno koulz hag en Bro-Wened
Kalz a dud kez en deuz tennet,
En deuz tennet da gâd Doue,
O tiski d'eze ar wir fe.

En enor da Dreinded santel,
E savaz eno eur chapel ;
Ha, goude kalz a vurzudo,
Ec'h ez ac'hane d'an Nenvo.

En e chapel eman bepred
E benn, e divrec'h binniget,
Ha gant-e kalz a relego :
Eun tenzor kaer meurbed d'ar vro.

Ar bobl gristen, diwech er bla,
A dired di da bardona,
Sur peb-unan deuz e vennad,
Pa bed Koneri gant fe vad

Pedet e ve ouz pep klenved,
Kenkoulz a gorf 'vel a spered,
Ouz an derzien hag ar pec'hed,
Gwasan klenved a zo er bed.

Da gâd Koneri ar moraer,
Gwall-nec'het dindan gwall-amzer,
A gas kalonek e beden,
Ha sant Koneri hen zouten.

Kemeromp skouer war ar sant-man,
Ha karomp ar bed evel-t-an,
Karomp Doue 'vel m'en deuz gret ;
Enon 'man an evurusted.

Sant binniget, Sant Koneri,
Reit e vennad da bep-hini :
Graz Doue a c'houlomp kentan
Ha treo an douar da diwan

Hag e ve pinijen gant-i,
 Da vo ho lezen hon hini,
 Ha goude reuz ar vue-man,
 Ni 'iel d'an Nê da diskwizan!

IMPRIMATUR:

Brioci, die 1^a maii 1899.

M. LE PROVOST, v. g.

TI MOULLEREZ SANT GWILHERM, BALI CHARNER, SANT-BRIEK
